

Ulertu nahi eza

Euskaldunon Egunkaria, 1997-03-23: 3.

Gaztelaniaz bada esaera bat neuk adierazi nahi dudanerako egokia dena, euskarara itzulita ere: *Entzun nahi ez duena baino gor okerragorik ez da*, baina esaldiaren mamia beti kontrarioarentzat uzten da, ez du inork berekiko hartzen. Oraintxe PSOeko eta PNVko bozeramaileek berriz erakutsi diguten bezala: bakoitzak beretzat badaki ongi bestea zertan ari den, baina ez du mezua zuzenean ulertu nahi, eta ingurumaria adarretatik hartu eta zezena, edo zekorral, botatzen ahalegindu beharrean, espainolismoa eta euskalduntasuna balantzan jartzen hasten dira esgrima politikoaren faltsukerian. Buesa jaunak badaki ongi Egibar jauna Euskal Herri osoa defendatzen ari dela, eta nola eta zergatik, baina ez baleki bezala sartzen du. Estatuko potentziatik, bere jokorako komeni zaion galgan. Gauza bera gertatzen da Frantziako Parlamentuan, bat frantsesera defendatzen ari da, bestea bretoiera, baina entzuten dagoen desinformatuak ez daki zergatik bat Frantziako inperioa ari den defendatzen eta bestea erretzen ari zaion etxea!